

**Sagı tə, Polə nə púpúnı v pa  
Filipə  
Kərisə lìa tə nə  
Filipə tiàn sagı tə yuu wa  
sugv**

*Liiu tə, v nə púpúnı sagı kv tə*  
Kv yi \*təntəv Polə nə púpúnı kv.

*Lìa tə nə, Polə nə púpúnı*  
Polə púpúnı sagı kv tə v pa \*Kərisə lìa tə nə, ba nə wulə Filipə tıfarv wa. Filipə yi kv wulə Masedwanə nagwanaa tə wa. Polə nə dıga Kərisə lìa púlí təntə dèń, kv m̀ ga nə yi Kərisə lìa púlé tə wa təntən púlí nasara luv wa. Polə swə Kərisə lìa púlí təntə zənzən.

*Sagı tə wa sugv*  
Nəjə kv tə yırı Polə nə púpúnı ba nə: Polə wulə bən diè, \*Kərisə lìa tə Filipə nə ga pa zilé wiən bə, tə pa wá, yá v dən kəni ba lèèèe.  
Polə pìà v birı də, càn yí Kərisə lìa tə, yá də kv nətv mə, ba tə mə, sə ba ya pupwən wa, ba tə mə, sə ba vwə ba tiàn \*Yuu-Tiu Zwezi-Kərisə nə, ba mə, sə ba tɔŋa ba pın duən nə, ba ga mə, sə ba sónı duən də ba waa mama, ndə v m̀ Polə nə.

*Polə j̀nı Kərisə lìa tə Filipə nə*

<sup>1</sup> À mù Polè dè Timote nè yí Zwezi-\*Kerisè tótunbía. Nè púpóní sagí kú tē, nè pín á mù, Filipè lià tē mama, á nè yí Zwezi-Kerisè nè tí. Nè púpóní kú, nè pín á yáá tián tē nè dē á tótunbía tē nè. <sup>2</sup> Nè nyina Yú dè nè \*Yuu-Tiu Zwezi-Kerisè nè wá fwa pubwanú á yíra, ba ga pa aba bican sié.

*Won tē, Polè nè lòrì Yú con, Filipè tián yíri  
(Kolosè tián 1.3-11)*

<sup>3-4</sup> Máná mama, à nè swìn á yoo à nyina Yú con, à yáá kē v lèèèe á yíri. Yá à yáá fwa kú nētú tē dē pupwən. <sup>5</sup> Kú zígí dún tē nè, á nè jigè \*Kerisè lià, kú ja bà kú yí zèn, á mù dē à mù nè tūŋa duən nè, nè swìn Zwezi-Kerisè suywánú tē, nè bírí. Kú mù nè pín, à kēni Yú lèèèe. <sup>6</sup> Á yèò dē, cígá mama Yú dígá tótunzēŋu dèñ á bicaní wa. Yá kú ja vèlè dún tē nè, Zwezi-Kerisè nè wá píí v bà, v wá fwa kú, v zwèe.

<sup>7</sup> Yú fwa v pubwanú tē à yíra, v ga fwa kú vàn don á dē yíra. Ba vwè nè dē banzala, yá à wá swìn Zwezi-Kerisè suywánú tē, à bírí. Á wá pa ba lwarí dē, kú yí cígá, lià tē, ba nè búrì búrà tē yáá con, dē diàn. Kú mù nè pín, à jè cígá, sè à ja pubŋa tētè dē á mama, à nè kēn á yoo à bicaní wa. <sup>8</sup> Á yoo yì nè zēnzēn. Yú yèò zēni dē, kú tà kunkun nè á kúní. Kú yí Zwezi-Kerisè sonu tē nè, à ma swè aba.

<sup>9</sup> Yá won tē, à dàñ nè lòrì Yú con, kú mù nè yí, sè á sonu tē súrì, wuuu kú ja lē. Kú mù nè wá pa aba yēnu, sè á wàní á lwarí nētú tē, á nè mē, sè á fwa. <sup>10</sup> Yá á dàñ wá wàní á kúrì kú tē

nə jə funə. Ku nətɔ tə dān wá pa, dɔn tə, Zwezi-Kərisə nə wá pìl ɔ bà, á bɪcɪnɪ wá ya nəpon, á ga bá ja yokɔkwɪnan, ba nə wá caga á nií tə nə yɪrɪ. <sup>11</sup> Yá ku máná tə wa, á wá ya là tə, á twá də Zwezi-Kərisə, á ma tɔŋa tɔtɔnzəŋə zənzən, tə nə bɪrɪ də, á yɪ cígá tìán Yɪ yáá con. Ku mù nə wá pa, là pa dun Yɪ nə, ba ga bu ɔ nə.

*Zwezi-Kərisə dwə won mama*

*(Marəkə 9.38-40; Romə tìán 14.7-8; 2 Korəntə tìán 5.1-9)*

<sup>12</sup> À nubɪa-ba, yìèn tə, tə nə yí nə, à pià, sə á lɔwɪrɪ də, tə san tə pa Zwezi-\*Kərisə suywánú tə kwɛn ku va yáá. <sup>13</sup> Ku yɪ cígá, mə ku twá də tə mù yìèn təntə, tə nə yí nə, pamana tə mama, ba nə wulə bɔrà diè tə wa, də ba duən tə mama ma yəó də, ku yɪ Zwezi-Kərisə yɪrɪ, ba vwə nə də banzala. <sup>14</sup> Ba vwə nə də banzala ku ga pa là tə zɔnɪ, ba nə yɪ à nubɪa Kərisə yɪrɪ, tə jə \*Yuu-Tiu diàn ɔ cwəŋə tə wa. Yá ku dān pɪn, ba kwɛn ba swìn Yɪ sɔgɔ tə də wɔdɪɔ, fən də ga ba ba jə.

<sup>15</sup> Ba wa là duən yɪ ba swìn Zwezi-Kərisə suywánú tə də wɔgwɔ, ba ma jɪga à mù Polə nə. Yá ba duən mù yɪ, ba swìn ku, də ba waa mama. <sup>16</sup> Ba mù fwa ku də sonu, ba ga yəó də, Yɪ nə ken nə yəbə, sə à swìn Zwezi-Kərisə suywánú tə də diàn, à bɪrɪ də, ku yɪ cígá. <sup>17</sup> Ba duən tə mù yɪ ba swìn Zwezi-Kərisə suywánú tə, sə ba ma jɪgɪ də nə. Ba sùràn tə tà də ba waa mama. Ba fwa nətɔ, ba ga buŋa də, ba wá súrí à càn tə, à nə wulə tə wa, à banzala tə wa. <sup>18</sup> Ku tà à yáá. Ba duən pubɔŋɪ wáá pubɔnkɔkwɪnan tə yanɪ. Ba duən də pubɔŋɪ wáá pubɔnzəŋə tə yanɪ. Yá ba

ga nè swìn Zwezi-Kørisè suywánú tē, à mù Polè tē wulè pupwèn wa, ku yoo tē yiri. Cígá mama, à tē wá kwèn à jwε, à súrí lá wuuu. <sup>19</sup> À yèé dē, ku nētɔ nè wá pa Yɪ jon nè. Ku nētɔ wá twá dē á yijɔn dē Zwezi-Kørisè \*Siŋu tē, ku dē nè saŋa nè. <sup>20</sup> À swə, sə yoo ku tē tɔn. À jə ku yala, dē à waa mama. Ku mù nè yɪ, sə à cì yoo dàn ká ya lá, cavira nè wá ja nè ku yiri, sə à tətə dàn wá kwèn, à lɪ à waa con síún nè, ndə fuən tē nè. Yá ku dàn nè twá à lɔɔ wulu nè, nè à yèé à tian nè, ba wá pa dun Zwezi-Kørisè nè. <sup>21</sup> À mù Polè con nè, Zwezi-Kørisè nè pɪn, à mu tē jə dēn. Yá tian dàn jə nywarɪ tē pa nè.

<sup>22</sup> Yá à mu nè wulè lɔɔ wa, à tē wáá tutɔnzəŋu à fwa. Ku mù nè pɪn, à kúv yèrì ku tē, à nè wá kúrí à tì. <sup>23</sup> À dàn yɪ à wulè yìèn bəlè tətəŋi wa. Vàn don nè, à swə zəni, sə à tɪ, sə à ya dē Zwezi-Kørisè. Ku mù ga nè wá ya ywání dē nè zənzən. <sup>24</sup> Yá vàn don dē nè, á mù yiri nè, à mu nè wulè lɔɔ, sə à san aba, ku dē jə funə zənzən, ku doni. <sup>25</sup> À yèé dē, cígá mama ku yɪ nētɔ, à ga yèé dē, à bá tɪ, à wá ya dē aba. À wá san aba, sə á va yáá Yɪ nyiən tē wa. Yá á dàn wá jwε, á nè keni á waa Zwezi nè wuuu, tē yiri. <sup>26</sup> Mánǵá tē, à nè wá pìí à bà á con, á dàn wá lɔɔ Zwezi-Kørisè nè zənzən á ja lɛ, à nè pìí á bà á con yiri.

*(1 Tesalonikè tián 2.12-16; Ebərə-ba 10.32-36; Tutɔnan 14.22)*

<sup>27</sup> Yoo tē ku nè dwə, ku mù nè yɪ, sə á ya là tē, á nè twá ku tē nii nè, Zwezi-Kørisè suywánú tē nè bɪrɪ aba. À pìà dē, à nè wá bà, à na aba, nè

à yèé à nè wà twi, sè à nì dè, á zɪga dɪàn, á ga jè nɪmarɔ. À pɪà, sè à nì dè, á kèni dɪàn dè waa nèdɔ, Zwezi-Kèrisè sɔyɔwánjɔ tɛ yɪɪ, á nè sèe. <sup>28</sup> Yá á kùdɔ ba, á dɔɲa tɛ fɛn durɪ míámíán. Kɔ mù nè wá bɪɪ dè, ba mù yɪ ba tɪ ba jén míámíán Yɪ yáá con, á mù ga wulɛ cwɛɲɛ wa, kɔ nè wá jon aba á cɔna wa. <sup>29</sup> Yá kɔ yoo tɛntɛ yɪ kɔ nan Yɪ. Yɪ nè pɪn aba yuywánjɔ. Kɔ tà, sè á kèni á waa ɔ nè wuuu, cɪcɪ. Kɔ yɪ, sè á dé càn dè ɔ yɪɪ. <sup>30</sup> Sɪún nè, à mù dè á mù mɛ dàñ nè saɲa duɛn nè, nè jaɲa. Á dí yáá á na jaɲa tɛ, à nè jaɲa. Yá sɪún nè, á nèñ dè, à tɛ wulɛ jaɲa tɛ wa.

## 2

### *Á yana ndè Zwezi nè*

*(Romè tián 15.1-7; 2 Korèntè tián 8.9; Kolosè tián 1.15-20; Ebərə-ba 1.1-4)*

<sup>1</sup> Á kèn á waa Zwezi-\*Kèrisè nè. Kɔ nètu pɪn súrí á bɪcɔnɪ naaa? Ʋ sonu tɛ dàn á jìàn naaa? Á nɪ torɪ Yɪ-\*Sɪɲu tɛ tarɪɔn tɛ wa naaa? Yɪ fwa pubwanɔ á yɪra naaa? Yɪ dèrɪ á yinɛgɛ zɛnzɛn naaa? <sup>2</sup> Dè kɔ nè yɪ nètu, à lòrɪ aba, sè á sóní duɛn dè Kèrisè sonu tɛntɛ, sè á ja pubɔɲa nèdɔ, sè á nii ya nèdɔ. Á nè fwa nètu, à pupwɛn tɛ dàñ wá ya cígá cígá pupwɛn. <sup>3</sup> Á dànà ká jɪɪ dè duɛn. Á dànà ká bu á tìàn nè. Á kèni á tìàn tɪa duɛn yáá con. Á ywáná lià tɛ ndè lià tɛ nè, ba nè wulɛ á yuu wa. <sup>4</sup> Á liù mama dàn ká bún kɔ tɛ nè zɪɛn, kɔ pa ɔ mù cɪcɪ nè yoo. Ʋ mɛ, sè ɔ bún kɔ tɛ nè zɪɛn, kɔ pa ba duɛn tɛ dè nè.

<sup>5</sup> Á pian, á pubuŋa tē ya ndə Zwezi-Kərisə pubuŋa tē nə.

<sup>6</sup> U də Yu me yà yi nədʊ. Yá ʊ ga wà pa ku ya yoo ʊ nə ba pìà, sə ʊ yá kʊ. <sup>7</sup> U yá ʊ dun tē mama, ʊ ga jì yonʊ. U jigə ləzwənə, ba luri wá, ndə ba nə luri ləzoni tē nətʊ. <sup>8</sup> U sèe ʊ mun ʊ tiàn, ʊ ga zìlí Yu nii, ʊ va ʊ ti\*. <sup>9</sup> Kʊ mù nə pin, Yu tì wá, ʊ kə dun bwálí wa, tē nə dwə won mama. Yu pin wá yiri tē, kʊ nə dwə yiri mama. <sup>10</sup> Kʊ twá kʊ yiri təntə nə, là tē mama, də wiən tē mama Yu sàñ nə, də tia yuu wa yəbə, də tia dəñ me, wá bà ba tʊ Zwezi yáá con, ba bu ʊ nə. <sup>11</sup> Liù mama wá sùrí ʊ nii, ʊ ga swìn, ʊ biri də Zwezi-Kərisə yi \*Yuu-Tiu. Yá kʊ dān wá pa dun nə nyina Yu nə.

### *Kərisə là tē yi ndə poni nə*

<sup>12</sup> À nubisoni-ba, máŋá tē wa, à mù də á mù nə yin duən nə, á zìlí Yu nii. Kʊ me, sə á tē zìlí Yu nii síún nə, máŋá ka tē də wa, à nə təl é á con. Yu jon aba á cuna wa, á dān tʊŋa kʊ tʊtʊnan. Á fwa kʊ nətʊ də zìlé zənzən də á vɪvaga ʊ yáá con, <sup>13</sup> Yu nə dí yáá ʊ tanɪ aba ʊ tún, sə á sóní yìèn tē, tē nə poli ʊ pùé, ʊ ga pa aba diàn, sə á tʊn tē də yiri. <sup>14</sup> Kʊ tē mama á nə fwa, á dānà ká ŋʊŋwɪn. Yá á dānà ká fwa tʊtʊnà də duən. <sup>15</sup> Kʊ mù nə wá pa, á ya là tē, á nə ba yoo jə, ba nə wá caga á nii nə kʊ yiri. Á ga wá ya Yu là tē, á bɪcanɪ nə yi nəpon Yu yáá con, á nə ba cuna jə. Á mù də ŋwɪna də wʊlwanyɪna-ba nə

\* **2:8** 2.8 Kʊ ga yi, ba paa wá dagarʊ yuu, ʊ ti.

wulə luv kv tē wa, á mε, sə á ya ba wa, ndə poni nə, kv nə pɪpɪlɪ. <sup>16</sup> Á mε, sə á swɪn sùràn tē, tē nə pɪn mu, á bɪrɪ là nə. Á nə fwa nətɔ, dɪn tē Zwezi-\*Kərisə nə wá pɪi v bà, à mù Polə wá na dɪn v yáá con, á yɪrɪ. Kv nətɔ bɪrɪ də, à càn tē, à nə dí tutɔŋɪ tē wa, də à nə gwàrì tē wà tutɔ twɪ. <sup>17</sup> Á keni á waa Zwezi nə. Kv yɪ ndə \*jɔŋɪ nə, á nə pɪn Yu nə. Ba nə gva nə, à jə pupwən. À mu tē wá ya jɔŋɪ, kv sùrí á jɔŋɪ tē nə. Yá à dàń wá jwε də á mama. <sup>18</sup> Á də mε, sə á ja pupwən nətɔ, á jwε də nə.

*Timote də Epafəroditə yoo*

*(1 Tesalonikə tián 3.1-11; 1 Korəntə tián 16.15-18)*

<sup>19</sup> Də kv nə yɪ \*Yuu-Tiu Zwezi fɪra, à jə yala də, à wá tun Timote á con síún. À pìà, sə mánjá tē wa, v nə pɪi v bà à con, sə v dàń à mù Polə jìàn, də tē tē v nə nì á con. <sup>20</sup> Mə v mù cɪcɪ nə yɪ liù v wulə à con, v də pubɔŋa tē nə yɪ ndə à nə, á yoo nə yì wá cígá cígá, ndə à nə. <sup>21</sup> Là tē duən tē mama yɪ ba təntɪan yìèn cɪcɪ nə ba bɔŋa. Yá ba ba Zwezi-\*Kərisə yìèn tē yuu ywàŋá. <sup>22</sup> Kv nə yɪ Timote mù, á yèé nətɔ tē, v nə bɪrɪ də, v yoo ba kwèe. À mù də v mù mε nə tɔŋa duən nə, nə swɪn Zwezi-Kərisə sɔy wáŋú tē, nə bɪrɪ. U san nə tutɔŋɪ tē wa, ndə bìú nə saŋa v nyɪna nə nətɔ. <sup>23</sup> À jə yala də, à wá wàní à tun wá á con lala, də à nə nɪ à yìèn tē yáá. <sup>24</sup> À jə yala də, kv nə yɪ Yuu-Tiu fɪra, à tətə Polə wá bà á con síún.

25 À nɪ də, kʊ mɛ, sə à pa Epafəroditə, ʋ nə yɪ à nubiu Kərisə yɪɾɪ, pɪí ʋ bà á con. Á tun wá à con, sə ʋ ja saɲʋ tə, à yà nə pɪà, ʋ ja bà ʋ pa nə. Yá à mù də ʋ mù dān ken dīàn nə tun Zwezi tutʋnan tə zənzən. 26 ʋ yɪra liɲa zənzən, sə ʋ na á mama. Yá á yoo ga jə wá, ʋ nə yèé də, á nì də, ʋ yɪra ba zurə yɪɾɪ. 27 Kʊ yɪ cígá, ʋ yà tʋa yayɪgʋ, kʊ ga mancɪn, sə ʋ mu zwèe. Yá Yɪ dān dəri ʋ yinəgə. Kʊ tà ʋ mù cɪcɪ yinəgə nə, Yɪ dəri. Kʊ yɪ də à mù Polə mɛ, sə pucʋnɪ nəfarʋ don kùd dān ká yí nə, kʊ súrɪ. 28 Kʊ mù nə pɪn, à bɪbarɪ, sə à pa, ʋ bà á con, sə á na wá, sə á ya pupwən wa, sə à də pucʋnɪ tə fʋ kʊ mun. 29 ʋ yɪ á don Kərisə liù nə Yuu-Tiu cwəŋə tə wa. Á zɪlé ba mù ləzwənyirə təntə. Máná tə wa, ʋ dān nə twi, sə á sèe, á jon wá də pupwən. 30 ʋ jon á yuu tutʋɲɪ ʋ tun, ʋ mu yà ga pɪà kʊ nan, tutʋɲɪ tə yɪɾɪ, á yà nə pɪà, sə á tun á pa nə, də á yà nə wulə à con. Kʊ yà ga mancɪn, sə ʋ mu zwèe Kərisə tutʋɲɪ tə yɪɾɪ.

### 3

*Zwezi-Kərisə dwə won mama  
(Galasi tián 5.1-6; 6.12-14; 1 Korəntə tián 9.24-27; 2 Piyerə 1.5-11)*

1 À nubɪa-ba, sʊgʋ tə, à nə wá ma zwèe nə yɪ kʊ tə: Á mù də \*Yuu-Tiu vwə duən nə. Á dān yana pupwən wa. Kʊ ba nə wʋwəlɪ, sə à pɪí à bwé kʊ tə wa, à nə dí yáá à swɪn á con. Yá á mù con nə, kʊ mù nə wá pa, á nì kʊ dəñ cígá cígá. 2 Lìà wulə, ba tʋɲa yokʋkwɪnan. Ba yɪ ndə kukuri nə. Ba yoo nə yɪ, sə ba \*gwəŋə bɛɛ. Yá



ku ga yi yotutu. Á cia á tián nè dè ba tē! <sup>3</sup> Nè mù nè yi lià tē, nè nè gwəŋə nè tián, yá ku ga jə dèń. Ku tà ba mù. Nè mù nè jə Yıı-\*Siŋu tē dián, nè ma tɔŋa nè pın Yıı nè. Nè pın dun nè tián nè Zwezi-Kərisə yırı. Nè ba nè waa kəni ləzoni yofwamınan nè.

<sup>4</sup> Də lià duən nè buŋa dē, ba mù nè wàá ba waa ba kəni ləzoni yofwamınan nè, à mù Polə nè dwə ba. À dē yà wàá à waa à kəni tē nè. <sup>5</sup> Á nəŋə yìèn tē, nè pın à dwə ba: \*Ebərə-ba nè luri nè, à ga yi Ebərə cígá cígá. À yi \*Yızərayelə-ba dwíí, Benzwamen\* dwíí dəkuu tē wa. Ba luri nè, ba gwəŋə nè, à luri dián nana diın nè. <sup>6</sup> Ku nè yi Yıı \*nii tē yoo wa, à yà yi \*Farızıan. À yà jə yawala zənzən, \*Zwifə-ba Yıı nii tē yoo wa. Ku mù nè pın, à yà fıfın Kərisə lià púlí tē. Ku nè kúbù yi ka twá Zwifə-ba Yıı nii tē nè zəni, sə ku ma bırı dē, à yi cígá tíú, à yà zılı Yıı nii tē mama. Yá à yà ba yoo mama jə ba nè wá caga à nii nè ku yırı. <sup>7</sup> À yà jələ tē yìèn təntə dē, tē mù nè jə nywarı. Yá síún nè Zwezi-Kərisə yırı, à dān jələ tē mama ndə tutu nè. <sup>8</sup> Cígá mama, tē mama yi ndə tutu nè. À yəó à Yuu-Tiu Zwezi-Kərisə. Ku mù yənu təntə ga nè dwə won mama. U mù yırı nè à sèe, sə à kwìn tē mama nè, à ga jələ tē mama ndə ywərən nè, sə à wàní à ya Kərisə liú. <sup>9</sup> À pìà, sə ku twá, à nè ken à waa Zwezi-Kərisə

---

\* **3:5** 3.5 Benzwamen yi \*Zwakəbə talıkwə biú, ɔ nè súrı ɔ bia nii nè, bia fugə bələ. Zwakəbə yi Yızərayelə yırı don. Yızərayelə dwíí tē pwèe pulə fugə bələ. Tə fugə bələ nii nyiən yırı nè yi Benzwamen.

nə, à ma ya cígá tíú Yü yáá con. À kùù bá pià, sə à ya cígá tíú Yü yáá con, à nə zìlí Yü nii tē yoo v nə pɪn \*Moyizə nə yɪɾɪ. Yü dàń nə pɪn, à yɪ cígá tíú, à nə ken à waa Zwezi nə yɪɾɪ. Kù tà à tətə. Kù mù nə pɪn, à dàń yɪ v mù liù míámíán. <sup>10</sup> Yoo tē à nə pià, kù mù nə yɪ, sə à yəni Zwezi-Kərisə. Yá à pià, sə à yəni diàn tē, v nə ja pií v bwin v nan. Yá à dàń pià, sə à dó càn də wá, sə à ya ndə v nə, mánjá tē wa, v nə tɪga. <sup>11</sup> Də kù nə swə kù yɪ nətɔ mama, sə à də pií à bwin à nan ndə v nə.

*Ka dəri ka va yáá wuuu yoo*

*(Romə tián 16.17-18; Ebərə-ba 13.14; 1 Zwan 3.1-3)*

<sup>12</sup> Kù tà à pià, sə à swìn də, à manwarɪ à na kù tē à nə piá. À ma kùù ba pià, sə à swìn də, à yoo mama manwarɪ kù ziən. Yá à dàń yɪ à kəni diàn, sə à wàní à ja wiən təntə, ndə Zwezi-Kərisə nə sèe nə nətɔ. <sup>13</sup> À nubɪa-ba, kù tà à wú, à manwarɪ à ja tē wiən təntə. Yá yoo nədu nə, à dàń fwa. Kù mù nə yɪ, à swèéé wiən tē, tē nə kèéń, à ga kəni diàn, sə à yí wiən tē, tē nə wulə yáá. <sup>14</sup> À dàń yɪ à dəri, à vələ yáá wuuu, sə à wàní à yí lá. Kù mù nə wá pa, à na ŋwírán tē, Yü nə kúrí nəba, sə v pa nəba. Ŋwírán təntə nə yɪ, sə à ya də wá Yü sán nə, Zwezi-Kərisə yɪɾɪ.

<sup>15</sup> Nə mù jigə nəkwɪna Yü cwəŋə tē wa. Nə mɛ, sə nə bún nətɔ. Də á nə bún yiri don, Yü nə wá bɪɾɪ kù aba. <sup>16</sup> Kù nə swə, kù yɪ nətɔ mama, nə vələ nə yáá wuuu, cwəŋə tē wa, nə nə yɪn ka wa, kù bà kù yí zèn.

17 À nubia-ba, á mama yana, ndə à nə yɪ nətʊ. Á ywàṅá lià tə, ba nə yɪ ndə nə nə, sə á də ya nətʊ. 18 À dí yáá à swìn tə yìèn təntə á con, nəε kapupu. Síún nə, à kùb pìí à bwé tə wa, ku dān ga yɪ də yinɪa. Lià dáá zənzən ba tutʊnɛ nə biri də, ba yɪ Zwezi-\*Kərisə, ʋ nə tɪga dagarʋ tə yuu wa, duŋa. 19 Ba mù lià təntə puswənə wiən nə yɪ ba yɪ. Ba tuŋa yìèn tə nə jə cavɪra, yá ba ga tə pɪn dun ba tiàn nə, də ku mɛ. Ba pubuŋa mama dān yɪ ka wulə tɪa yuu wiən tə con. Máná don biàn Yɪ nə wá cùgù ba. 20 Ku nə yɪ nə mù, nə mù yɪ Yɪ \*sán lià. Ku yɪ nə \*Yuu-Tiu Zwezi-Kərisə, ʋ nə jon nəba nə cuna wa, nə dānì, də ʋ naŋa Yɪ sán nə, ʋ cwì nə con. 21 U nə twi máná tə wa, ʋ wá lwàn nə yɪra tə, tə nə ba dun jə, ʋ pa tə jì ndə ʋ tətə yɪra tə nə, tə nə jə dun. U wá fwa ku nətʊ tə də diàn tə, tə nə pɪn, ʋ wulə wiən tə mama yuu wa.

## 4

1 À nubisoni-ba, ku mù yɪrɪ nə, á dān zɪga zəni, də \*Yuu-Tiu máná mama wuuu. À nubia-ba, à swə aba zənzən. À ga pìà, sə à pìí à na aba cígá cígá. À wulə pupwən wa á yɪrɪ. Yá à wá na dun yupuu á mù yɪrɪ.

*Sagɪ tə kwìè bwálí*

*(Filipè tián 2.1-3; 1 Tesalonikè tián 5.16; 1 Piyerə 5.7; Kolosə tián 4.2; Zwakə 3.17-18)*

2 À kwè Evodi də Sentiswə, ba mù kana bələ təntə sə ba ja nimarʋ, ba nə yɪ \*Yuu-Tiu lià tə yɪrɪ. 3 Yá n mù liù tə, n nə yɪ pùé nədʋ tíú, n

ga yi à tütündon, à lòrì mú, sè n san kana bələ təntə nə. À mù, də ba mù, də Kəleman, də tütùná tə duən nə kálí nə tián nə swìn Zwezi-Kərisə sɔywanjú tə nə bɪrɪ. Yɪ púpúní ba mama yɪra sagɪ wa. Kɪ nətɪ bɪrɪ də, ba jə mɪ tə, kɪ nə ba zwèe ɔ con.

<sup>4</sup> Á wulə də Yuu-Tiu Á dàń yana pupwən wa dɪn mama. À tə kúò bwé kɪ wa: Á yana pupwən wa! <sup>5</sup> Á pɪan là tə mama lwarɪ də á jə pubwanɔ. Yuu-Tiu túrí bwələ. <sup>6</sup> Á dàná ká pa, won mama yoo ja aba. Yoo mama nə twi, sè á twá də yɪjɔnɪ, á lòrì won tə, á nə pìà Yɪ con. Á nə lòrì Yɪ con nətɪ, sè á kə ɔ lèèèe də. <sup>7</sup> Yá Yɪ wá pa bɪcan sié aba, tə nə dwə won tə mama nə nə wàá kɪ dèń nə nì. Bɪcan sié təntə dàń wá pa, á fɪra də á pubɔja ya də Zwezi-Kərisə.

<sup>8</sup> À nubɪa-ba, kɪ tə, à nə wá swìn à gúrí nə yɪ yìèn tətə. Á nənə yìèn tə nə mɛ, sè tə ya á pubɔja yìèn: Tə mù nə yɪ yozənə tə, là nə bwɪ tə nə, də yìèn tə, tə nə yɪ cígá yìèn Yɪ yáá con. Də tə tə ba cɔna jə. Də tə tə ba nə mɛ, sè ba sóní, ba ga bɪrɪ də, tə zìən. Də yofwamɪnan nəzənə ba nə bwɪ tə nə. <sup>9</sup> Á də dàń fwa yìèn təntə à nə bɪrɪ aba, də tə tə, á nə sèe, də tə tə, á nə nì, də tə tə, á nə nɪ də, à fwa. Yá Yɪ tə, ɔ nə pɪn nəba bɪcan sié, dàń wá ya də aba.

*Polə kəni ba lèèèe ba zilé tə yɪrɪ  
(Ebərə-ba 13.3, 5, 16; Filipè tián 1.7; 2 Korəntə tián 9.6-15)*

<sup>10</sup> \*Yuu-Tiu pɪn, à jə pupwən, á nə kúò pìí á wulə á saɲa nə yɪrɪ. Á bɔja à yoo, kɪ dán, yá

á wà wàní, sè á san nè. <sup>11</sup> Kù tà à swìn nètù, won nè mùrì nè yírí. À mì nètù tẹ, à nè wá ya pupwèn wa, yoo mama wa. <sup>12</sup> À yèé, nètù à nè wá fwa dẹ, won nè mùrì nè. À ma kùdò yèé, nètù à nè wá fwa dẹ, à nè jẹ wièn zènzèn dẹ. Yoo mama wa, à mì ka dọ ka sù, à ga mì nièn janù dẹ. À mì ka ja wièn zènzèn, à ga mì won nè mùrì nè dẹ. <sup>13</sup> À wáà tẹ yìèn tẹntẹ mama, à fwa dẹ diàn tẹ, Zwezi-Kerisè nè pín nè. <sup>14</sup> Yá dẹ nètù mama, á fwa zèni dẹ, á nè san nè à yojanan tẹ wa. <sup>15</sup> Á mù Filipò tián-ba, á yèé dẹ, kù jùv mama à swìn Zwezi-\*Kerisè sùwáṅú tẹ, Masedwanè nagwanaa tẹ wa. Yá à nè pìí à vírí, máṅá tẹ wa, á mù cìcì nè san nè. Kerisè lià púlí don mama wà lá yín à mù dẹ ba mù nè pín wièn duèn nè, nè ga jon wièn duèn con, dẹ kù nè tà á mù cìcì. <sup>16</sup> À nè kùdò yín Tesalonikè dẹ nè, á nèε bələ me, á nè pín, won tẹ, kù nè mùrì nè, bà kù pa nè. <sup>17</sup> Kù tà á zìlẹ wièn tẹ, à pìà. Kù tẹ, à nè pìà, kù mù nè yí, sè Yú pa aba kù ṅwírán zènzèn, ndẹ tíú nè zín bia zènzèn nètù. <sup>18</sup> À ní tẹ tẹ mama, á nè tún à nè, tẹ ga búrí nè. Máṅá tẹ, à nè ní wièn tẹ, Epafèroditè nè ja bà, v pa nè, won mama kùdò wà nè mùrì. Tẹ wièn tẹntẹ yí ndẹ tiralí nè, kù lwán nè ywán zèni. Tẹ ga yí ndẹ \*joni nè, kù twá Yú fira nè, v ga swè tẹ. <sup>19</sup> Yú yí dun nẹfarù tíú, yá v ga wá pa aba, kù tẹ mama nè mùrì aba, Zwezi-Kerisè yírí. <sup>20</sup> Dun tẹ mama me, sè tẹ ya nè nyina Yú nyièn, máṅá mama, wuuu, kù nè ba zwèè. Amúna!

*Sagí tẹ jòndà bwálí*

<sup>21</sup> Á jùnà là tē mama, ba nē yí \*Kərisə nē tɪ, á pa nē. Kərisə là tē, ba nē wulə yəbə, də jùnì aba. <sup>22</sup> Kərisə là tē mama jùnì aba. Ba tē, ba nē jùnì aba, ba doni, kv mù nē yí \*Romə-ba pìú nəfaru kàrá là tē.

<sup>23</sup> \*Yuu-Tiu Zwezi-Kərisə pubwanu tē wá ya də á pubuɲa tē.

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

d18530a7-7259-5f23-92b6-70e3abe5f3fa